

PPko gobernuak ez du EAJrekin duen hitzarmena hausteko asmorik

Hala jakinarazi zuen atzo Francisco Alvarez Cascos lehendakariorde lehenak

Sozialisten eskaerari entzungor egingo dio Jose Maria Aznarren gobernuak. Joaquin Almunia PSOEko idazkari nagusiak jeltzaleekin dituzten harremanak hausteko eskatu badio ere, ez duela egingo erantzun dio Francisco Alvarez Cascosek, Gobernuako lehendakariordeak.

Erredakzioa / Donostia

ALVAREZ CASCOSEK ez du aintzat hartuko Almuniaaren gomen-dioa. Gainera, adierazi du norbaitek ezin badu gomendiorik eman, hori alderdi sozialista dela, azken hamabi urte hauetan EAJrekin elkarlanean aritu delako. «Gobernuak ez ditu hautsiko alderdi nazionalistekin dituen hitzarmenak; izan ere, bateragarria da kritikekin, desadostasunekin eta beste iritziz batzuekin. Sozialistek, gainera, ez dute legimitaterik hori eskatzeko. Izan ere, PSOEek EAJren laguntza eskatu eta bilatu zuen, eta harreman hori PSOEek Gobernuak galdu zuenean hautsi zen», adierazi zuen Radio Nacional irratiari.

Almunia, bezperan, dei egin zion Jose Maria Aznar gobernu-buruari EAJrekiko harremanak bideratu eta biolentziaren aurka-ko adostasuna berreskura dezaten. Almuniaaren arabera, EAJk ez du bide onik hartu HBrekin elkarriketak egitea erabakita, eta horri esker Ajuria Eneko Ituneko alderdien batasuna hautsi egin dela esan zuen PSOEko idazkari nagusiak.

Alvarez Cascosek «koherentsiaz» jokatu duela adierazi du: «PSOEren koherentsiarik eza nabaria da. Besteak eskatzen die-na ez du berak betetzen, eta horrela zaila da PPri koherentsia eskatzea. PPk, oposizioan eta go-



Francisco Alvarez Cascos, atzo RNEen eginiko elkarriketan.

JAVIER HERRAEZ / EFE

bernuan, beti berdin jokatu du elkarriketaren aukeraren inguruan. PSE-EEk, ordea, aldatu egin du. Orain arte Jaurilaritzako kide izan da EAJrekin, eta legintzaldia amaituta dagoenean kontu hauekin datorkigu. Ez gaituzte engainatuko».

Jeltzaleekin hautsiko ez duen arren, PPk ez ditu onatzen ematen EAJ-HB elkarriketak. «Hanka-sartze bat da, oso larria gainera. Ez du inolako zentzurik HBrekin hitz egiteak ETAk armak uzten ez dituen bitartean. Guk terrorismoari aurre egingo diogu Ajuria Eneko Itunaren letra eta izpirituarekin», adierazi zuen.

Gobernuako lehendakariordea-

ren aburuz, Ajuria Eneko Itunaren letra «oso garbia» da. «Duela hamar urte alderdiok hitzartu genuen ETAk hiltzen segitzen duen bitartean ez duela zentzurik elkarriketa prozesua zabaltzeak. Guk fidelak izaten segitzen dugu hitzarmen harekin. Pentsatzen dugu ETAk armak uzten ez dituen bitartean elkarriketak ez duela zentzurik baretze prozesuan aurrera egiteko. Izan ere, hori txantajeari amore ematea litzateke».

CiUK bat egin du EAJrekin • CiUK, bestalde, elkartasuna adierazi dio alderdi jeltzaleari, eta Almunia esandakoak gaitzetsi ditu.

Joaquin Molins CiUren Kongresuko bozeramaileak adierazi du bere alderdia «harrituta» ikusten ari dela alderdien arteko giroa. «Hau intolerantziarantz doa eta ez du zerikusirik Ermuko izpirituarekin. Gainera, ez digu laguntzen terrorismoaren aurka».

EAJren jarrera babestu du Molinsek: «Terrorismoa ez dugu amaituko gure artean liskarrak badaude. Denok dakigu marra-aren alde honetan zeintzuk dauden, eta ez dut zalantzan jarriko EAJ alderdi demokratikoa dela». Molinsek gogora ekarri du EAJ Konstituzioaren aurka egon dela beti, eta PSOEren jokabidea elektoralizatzen jo du. X

EAJk Almunia erantzun dio esanez inork ez dituela jeltzaleak akusatu ordena konstituzionala hausteaz

■ Almuniaaren hitzak ez duela batere balio eta ez diotela garrantzirik ematen esan du Anasagastik

Erredakzioa / Donostia

JAURLARITZAKO hirukoa hautsiz geroztik, EAJren eta PSOEren arteko tirabirak ez du etenik izan. Almunia eginiko deklarazio batzuei erantzun zien atzo EAJk; izan ere, Joaquin Almunia PSOEko idazkari nagusiak EAJri esan zion Konstituzioarekin leiala izateko. «Gauza bat da Konstituzioaren zina egitea, eta beste bat leialtasun konstituzionala», esan zuen Almunia.

EAJk atzo erantzun zion Almunia. Alderdi horrek erregimen konstituzionala martxan jarri zenetik haren zina egin duela azal-

du zuen. «EAJren hitza Almunia jaunarena eta haren alderdiarena baino askoz ere sendoagoa eta kontsekuenteagoa izan da», dio EAJren oharrak. Inork ez duela EAJ ordena konstituzionala aldatzeaz akusatu azaldu du: «Inork ez du EAJ akusatu ahal izan ordena konstituzionala hausteaz, Auzitegi Goreneko Luzon fiskalak PSOEko gobernuakide garrantzitsuekin egin berri duen moduan».

Iñaki Anasagasti EAJko diputatuak ere kritikatu zuen Almunia. Izan ere, PSOEko buruzagiak, lehen aipatutakoaz gain, esan zuen alderdi sozialista berriz Gobernu helduko balitz ez

lukeela EAJrekin itunik egingo. Anasagastiren iritziz, «Almunia-aren diskurtsoak gero eta antz handiagoa du Garcia Danborearen diskurtsoarekin, baina ez dugu oso serio hartzen, haren hitzak ez baitu batere balio». Orain arte zenbait gauza hitzeman eta ez dituela bete esan zuen Anasagastik bere iritzia argudiatzeko.

PSOEren aldetik ere zenbait iritziz kaleratu ziren. Joaquin Almunia berak berriz ere Konstituzioari leiala izateko eskatu zion EAJri atzo. «Demokraten arteko batasuna» lehenbailehen berreskuratu beharra aipatu zuen, eta bereziki PPri eta EAJri egin zien dei. Bata-

suna berreskuratu ezean etekina lortuko duen bakarra ETA izango dela adierazi zuen. «Guztion askatasuna terroristekin batera elkarriketa mahaian jartzeko prest dago EAJ?», galdegin zuen Almunia.

Jesus Egiguren PSE-EEko idazkariordeak dioenez, alderdiak alferrik ari dira tentsioa areagotzen. «Zentzuduna» izateko eta «moderazioz» jokatzeko eskatu zuen. Azkenik, Nicolas Redondo Terreros PSE-EEko idazkari nagusiak azken hilabeteetan EAJ aldatu egin dela esan zuen hirukoaren apurketa argudiatzeko. X

Bilboko gotzainak Ermuko manifestazioarekin bat egitea kritikatu dute HBk eta AABek

■ Gatazkaren inguruan Elizaren jarrera «isiltasuna» izan dela diote

Erredakzioa / Donostia

HERRI BATASUNAK eta Amnistiaren Aldeko Batzordeak kritikatu egin zuten atzo Ricardo Blazquez Bilboko gotzainak eta haren ordezkari Karmelo Etxenagusia bihar Ermuan egingo den manifestaldiarekin bat egin izana. Blazquezek kaleratutako oharraren Ermuan duela urtebete sortu zen mugimendua mirez garria dela esan zuen. Xantzi Kiroga HBko kidearen iritziz, «inmobilismoaren alde eta irtenbidearen kontra manifestatzeko dei eginez, momentu bat helduko da non inork ez duen Elizaren beharrik izango irtenbideak bilatzeko».

Elizak behin eta berriz boterearen alde egin duela esan zuen Kirogak. Orain arte, ordea, antzeko beste zenbait gertakizunen inguruan ezer gutxi esan du Blazquez gotzainak, HBren idurikoz; horrela, GALen gerra zikina, atxilotaketak, torturak eta tratatu txarrak aipatu zituen, besteak beste.

Erdialdeko Amerikan Elizak eginiko lana zeinen ezberdina izan zen nabarmendu zuen Kirogak. Era berean, Euskal Herrian irtenbide elkarriketatatu baten alde agertu ziren 600 apaizak aipatu zituen.

Amnistiaren Aldeko Batzordeak ildo beretik mintzatu ziren. «Madrildik inposatutako sofrimendurik bidearekin bat egitea» egotzi zioten AABek Blazquezi. Orain arte horrela bati bati buruz iritzirik ez dutela eman nabarmendu zuten AABek ere. Gatazkaren inguruan Elizaren jarrera «isiltasuna» izan da AABek diotenez, baita tratatu txarren, torturen eta presoaren sentikortasunaren inguruan ere. Hilaren 18an Juan Carlos Herriaren presoaren heriotzaren gogoratu eta orduan orain hartu duen jarrera bera hartzeko eskatu zioten AABek.

Yanesen babesa gotzainari • Bestalde, Blazquezek ohar-eran Ermuan sortutako mugimenduaren inguruan alderdiak eginiko erabilpena eta instrumentalizazioa ere salatu zuen. Horrek alderdien kritikak eragin zituen, eta atzo Elias Yanes Gotzainaren Batzarreko lehendakariak babesa eskaini zien Blazquezi eta Etxenagusia, kritika horiek zirela eta: «Gozzainaren oharrarekin bat egiten dut erabat». Ohar hori kon-tuan hartzeko dela esan zuen Yanesek. X